

10. juni 2020.

OBAVIJEST ZA MEDIJE

U utorak, 9. juna, održan je sastanak predsjednika ustavnih sudova Bosne i Hercegovine, Crne Gore, Republike Sjeverne Makedonije, Republike Slovenije i Republike Srbije putem *online* platforme, na inicijativu predsjedavajuće sutkinje Ustavnog suda Crne Gore Desanke Lopičić i predsjednika Ustavnog suda Bosne i Hercegovine Zlatka Kneževića, a u organizaciji AIRE centra.

Ovo je drugi sastanak u nizu na kojem se razgovaralo o izazovima i iskustvima s kojima se susreću ovi sudovi tokom pandemije COVID-19, načinima organizacije rada sudova u svakoj od ovih zemalja i budućoj saradnji među sudovima. Na sastanku je dogovoreno da AIRE centar organizira skup za registrare i pravne savjetnike ustavnih sudova regiona u junu 2020. godine, te da tema skupa bude sloboda kretanja u kontekstu COVID-19 krize i Evropske konvencije za ljudska prava. Predavači će biti cijenjeni eksperti za ovu oblast iz Evropskog suda za ljudska prava.

Povodom sastanka, **Desanka Lopičić**, predsjedavajuća sutkinja Ustavnog suda Crne Gore, izjavila je: „Događaji izazvani virusom COVID-19 predstavljaju u svakom pogledu krizu koja je zahtijevala snaženje saradnje između ustavnih sudova čija je primarna obaveza zaštita prava i sloboda građana. Ustavni sudovi, u okviru svojih nadležnosti, u predmetima povodom preduzetih mjera, tokom trajanja epidemije imaju važan zadatak da ocijene srazmjernost ograničenja prava i sloboda građana u odnosu na njihovo ustavno i konvencijsko pravo na zaštitu zdravlja.”

Zlatko Knežević, predsjednik Ustavnog suda Bosne i Hercegovine, dao je osvrt na novu praksu Ustavnog suda Bosne i Hercegovine u vezi sa slobodom kretanja u

novonastalim okolnostima uzrokovanim COVID-19. Također je ukazao i na nove odluke odgovornih agencija kojima su postepeno, ali ipak znatno liberalizirane prethodno uvedene mjere. Predsjednik Knežević je naglasio da, bez obzira na mjere uvedene u kontekstu COVID-19 krize, Ustavni sud u svom radu nema zaostataka jer se rad od kuće odvijao nesmanjenim kapacitetom zahvaljujući digitalizaciji rada Suda.